

# **Songtexte**

## **Album "Backstage" von Form Banal**

**inkl. Single "Outtakes" (Backstage)**

Release: 15. Januar 2021

[Website von Form Banal](#)

# Tankdeckel

## 1. Strophe

Ech suech min Tankdeckel  
wo isch min Tankdeckel  
jo ond min Gäldseckel  
wo isch min Gäldseckel

Ech suech ond suech ond suech  
ond fluech ond fluech ond fluech

## Refrain

Jetzt isch min Tank  
ganz ohne Deckel  
jo ond mis Gäld  
so ohni Seckel

Seckel...

## 2. Strophe

Ech suech ond suech ond suech...  
ond fluech ond fluech ond fluech...

# Lueg üs mol a

## Intro

Ah  
höt isch weder so en Tag  
woni einfach gar nöm mag  
ech be randvoll  
bruch e Nöistart

## 1. Strophe

Ech setze chli ufs Sofa  
ond es werd mehr klar  
dasi emmer noni weiss  
was de Senn vom Läbe isch

## Refrain

Loeg üs mol a  
met allne üse Narbe  
semer ned schön  
genau so wemer send

## 2. Strophe

Mer send doch am Läbe  
hend scho vel gseh  
hend Fröidegömp gmacht  
alli Sorge überläbt

# 8 Milliarde Stars

## 1. Strophe

Ech stone of mim Balkon  
ond lueg of d'Wält  
wene Star

Alles isch en Böhni  
woni mini Rolle  
spele cha

Ond of dere Böhni  
im gliche Theater  
spelsch au du

Me warted zäme of Godot  
hend Bsuech vonere alte Dame

## Refrain

Hemmer, hemmer, hemmer  
ned ali eine verdient

En Oscar för üses Läbe  
ond en Golden Globe

Secher semer  
nor en Forz  
im Universium

aber uf üsere Bühni  
semmer alli Stars

## 2. Strophe

Wenn d'Schinwärfer us gönd  
mer im Backstage send

semmer chorz verlore  
well mer nüd me spele chönd

Me speled  
ond speled  
bes zom bittre Ändi

wo üs de Dolch im Roge steckt  
ond de Vorhang zoge werd

# Metamorphose

## 1. Strophe

Wenn'd lang  
onderwägs besch  
wotsch velecht  
mol nöimed acho  
Worzle schloh  
om gnueg Halt zha  
wenn de Storm chond

## Refrain

Vo de Raupe zom Schmäätterling  
isch's a lange Wäg  
Du fresisch di satt  
denn verpoppsch di

Es fendet Grosses statt  
es beldet sech Flügel  
damet nöm omechrüche mosch  
sondern flüge chasch

## 2. Strophe

Veli blibed Raupe  
well si ned chönd  
ufhöre zfrässe  
Aber wenn'd acho magsch  
om Worzle zschloh  
ond verdaue wotsch  
chasch di entfalte

# We de Fochs

## 1. Strophe

Wenn'd gliebt wotsch wärde  
Vertraue suechsch  
muesch di welle öffne  
muesch di zeige

Us em Schotz cho  
sechtbar wärde  
ond zueloh chöne  
verletzlech zwärde

## Refrain

We de Fochs us em chline Prenz  
wo zämt wott wärde  
damet er hendrem Baum  
cha vöre cho

Wenn d'Angscht chasch überwende  
offe besch för dä Prozäss  
chasch ändli d'Höhli verloh  
ond de Liebi entgäge go

## 2. Strophe

Fended öper  
Zuegang zo der  
met gnuieg Gedold  
bes chasch vertraue

ond gschpört Erföllig  
scho nor im Warte  
öper wo Fröid hed  
wenn'd nöcher chonsch

# De schwarzi Panther

## 1. Strophe

Hesch du au scho mol das Glöck gha  
döfe z'erläbe, was passiert,  
wenn of di anderi Site  
vom Vorhang gosch

Hesch au scho mol chönne flüge  
ned wene Schmäterleng  
au ned wene Vogel  
sondern eher wede Wend

## Refrain

Är macht mi frei  
min schwarzi Panther  
während dosse  
de Börgerchrieg tobt

legemer zäme im Bett  
enand begleitend  
i de Melancholie  
ond Vergänglichkeit

## 2. Strophe

Velecht isches d'Rettig  
dess mer chönd fühle  
de Härzschlag vom andere  
enand döfed berüere

Si nened's d'Liebi  
si nened's es Märli  
si nened's en Traum  
erläbt i de Werklechkeit

# Jedi Zit brucht sini Helde

## 1. Strophe

Esch es werklech nötig  
dass'mer alles kommentiered  
emmer bewärted, usschlüssed  
ond instrumentalisiert?

We sett öper öpis gseh,  
wenn er nöimed andersch härelueged?  
Wie wotsch öperem öpis erkläre,  
wenn's en gar ned interessiert?

## Refrain

Jedi Zit  
brucht sini Helde  
D'Ändlechkeit vom einzelne  
esch d'Verussetzig för Wachstom

Jungs werd alt  
ond Neus wachst noch  
d'Fröhd vo höt  
send de Humus vo morn

## 2. Strophe

Es esch doch gar ned schlemm  
wenn d'hin ond weder  
d'Idee ond Wönsch vo de andere  
ned verstosch

Anderi Prägige ond Gschechte  
nüd hed weniger Wärt  
ond weniger Berächtigung  
als das vo de andere



# De Jesus vo Bärn

## 1. Strophe

Jo de Jesus läbt jetzt in Bärn  
isch emmer no männlech ond wis  
ond of jedere Demo gäge alles  
well är isch nor för sech sälber

Sini Sälbschtwahnämig isch so abghobe  
dass är richtig schwebt  
öberem Sompf vo sinere narzistische Sälbschtgfälligkeit

Sini Ideologie läbt devo  
dass sie anderi kritisiere  
ond sech öber si setze cha  
E Systematik wo mer kenned  
wo of Schinheiligkeit basiert

## Refrain

Ond er seid:  
Es wär doch so eifach  
Gänd allne gnueg Gäld  
damet niemer schaffe mues

Bsetzed ned me  
als 64 Sache  
Setzed underm Baum  
bes de Öpfel sälber abegheit

Wenner mol onzfrede send  
längt ätherischs Öl  
Joga ond en Tanz  
ome Baum

## 2. Strophe

Är fendet sech sälber  
ned nor nochhaltig heilig  
är schreit's au allne is Gsecht  
ond prediged satt gfrässe  
vo de Spetze vo de Privilegierte abe  
usem Luxus, be allem en Wahl zha  
ond i 15 Johr  
isch er denn sälber  
CEO vomene grosse Konzärn

# Zombies

## 1. Strophe

Chom me gönd offline  
Chom me möched's üs mol gmüetlech  
Lueged en Felm of DVD  
losed alti Musig of CD

Chom me zönded  
en analogi Cherze a  
Setzed meteme guete Buech  
ofs bequemi alti Sofa

## Refrain

Ond scho nach 5 Minute  
chratzed a üsre Tör  
die erschte Zombies  
wo sech vo üsere  
Ufmerksamkeit  
ernähre mönd

aber höt  
gets vo üs  
mol nüd

## 2. Strophe

Die vele Likes of Instagram  
gänd ned werklech warm  
wenn d'chalt hesch  
möched ned weniger einsam

Sie hälfed ned  
s'Gfühl überzcho  
dass gnueg besch  
ond ou ohni Makeup wonderschön besch

# Fata Morgana

## 1. Strophe

De Ändi Warhol hed scho gseid  
dass jede Mensch mol 15 Minute  
wältberühmt werd si  
So, jag die 15 Minute  
oder skip dä ganzi Scheiss

Suech der es sechers Stöckli Land  
met eme Plätzli för din Helikopter  
i dem grosse Meer (oder isch's e Wüeshti?)  
vo dem Gsellchafts-Bisnessmodell

## Refrain

Ond loh di grosse Schiff verbi zie  
met all dene selbstoptimierte  
beruschte, betäubte und gierige Uniformierte

Es send nor Spieglige vo ergendwelche Liechter  
so ne Art Fata Morgana  
Össerigsforme vo massetauglech gwordene Zitgeischer

Ond wenn hin ond weder eine vo Board vo dene grosse Scheff sprengt  
nehm en be der uf  
ond zäig em  
wemer es eignigs Näscht baut  
en eigni Ensle

## 2. Strophe

Inere Wält  
wo's meh Stars als Fäns ged  
meh Coaches als Schüeler  
Ond lueg  
dass es a dim schöne Strand  
kei Möll vo ene aschwemmt

# Wenn alles wäg esch

## 1. Strophe

Weisch no  
wo d'jong gseh besch  
ond s'Gfühl gha hesch  
dass mendischtens en König besch

Wo's klar gseh esch  
dass s'Läbe es Büffe esch  
du's Rächt druf hesch  
dass emmer im Zentrom besch

## Refrain

Ond plötzlech  
besch ganz elei  
well's emmer nor  
om dech gange esch  
ond das för dis Omfäld  
öber längerer Zit  
ned verbendend ond ned nährend esch

Was besch denn no  
wenn alles wäg esch  
wo di gnährt ond gfördered hed  
wo gmacht hed was du wotsch  
aber ebe nor of Zit  
ond di Zit isch verbi  
jetzt mosch sälber öppis si

## 2. Strophe

Du hesch velecht dänkt  
dass d'Wält en Supermärt esch  
wo jederzit chasch hole  
of was grad Loscht hesch

Du hesch's verlangt  
s'ganz grosse Glöck  
dass alles so si mues  
dass es för dech passend esch

# Verlür di ned

## 1. Strophe

Ech mache Tör zue  
wäg met all dem Lärm  
dem ganze Schall ond Hall  
wo so vel Ufmerksamkeit brucht

S'Lütischt hed gwonne  
scho möched alli met  
morn isch's scho öpis anders  
wäg all dem Lärm ghöri nüd

## Refrain

Verlür di ned  
werd ned taub ond stomm ond blend  
i all dem Lärm  
vo dene Stimme wo ned dini send

Dominanz isch kei Toleranz  
Wer im Kampf esch, esch ned im Frede  
Alles hed zwöi Site, nüd isch heilig  
es get kei Tüfel, nor de Mensch

## 2. Strophe

S'Läbe isch keis Konzept  
Went nöimed andersch stosch, gsets total andersch us  
S'Wösse vo höt  
isch morn scho überholt

Es ged Milliarde vo Mensche  
ond mer ond grad du  
hend s'Gfühl en Ahnig zha  
was d'Wohrheit isch, om was es goht

# Schrib dini Gschecht

## 1. Strophe

Guete Morge  
altbekannts Gsecht  
das ben ich  
met minere Gschecht

Bes ned trurig  
isch verbi, was gse esch  
fröi di of höt  
fröi di of morn

## Refrain

Verges ned  
du besch de Held i dinere Gschecht  
ond kei Gschecht isch spannend  
wenn's emmer rosa esch

D'Wält wott  
dass ned ufgesch  
au wenn's mol  
grad ned so schön esch

## 2. Strophe

S'Läbe isch es Buech  
s'Läbe isch en Felm  
Szene om Szene  
Kapitel om Kapitel

Schrib dini Gschecht  
emmer schön witer  
Trei witer  
a dim eigene Felm

## **Outtakes**

# Loopings

## 1. Strophe

Din Hemmel isch so wenzig  
dass d'Wolke schnell d'örezoge send  
du chasch gar ned gseh  
wohär sie chömed ond wo si häre gönd

Zoom emol use  
fö es grössers Beld  
es ged so vel meh als die drü Bäum  
wo vo dim Standponkt chasch gseh

## Refrain

Chom mer möched  
en Flog im Solarflogzüg  
damet mer mol en Öberbleck überchömed  
we so mängs zämehänge chönt

Chom mer flüged Loopings  
damet's üs mal richtig omewerbled  
ond all das Züg im Chopf lockered  
wo so fescht gsässe schint

## 2. Strophe

Denn mömmer nömm us Reflex  
of alles schiesse  
wo e Gfahr chönt sie  
nor well sech's bewegt

ond nöm grad reagiere  
mit dem änge Tunnelbleck  
well mer ohni klari Secht  
inere Vorstellig gfange send



# Ned me als i be

## 1. Strophe

Ech setz i mim Zemmer  
ich setz im Kafi  
allei amne Teschli  
met em Computer

Ech weiss nöm was i wot  
ech weiss nöm wer i be  
be doch nor no  
en Typ am Computer

## Refrain

Ech wär so gärn  
weder en Mensch  
ond nor en Mensch  
ond ned no meh

Ech wär so gärn  
nor eifach mich  
ganz ohne PC

## 2. Strophe

Ech set mol use  
chli go laufe  
ond Frönde träffe  
ganz ohni Computer

Chli offline go  
z'versuche z'verstoh  
wer i chönt si  
ond was i wott

© Florian Burkhardt  
<https://formbanal.com/>